

«Urgentamain dapli trasparenza»

Forum mundial d'economia

DA GION NUTEGN STGIER / ANR

■ **Il responsabel dal Forum mundial d'economia (FEM) n'èn betg totalmain cuntents cun Tavau. La raschun èn ils pretschs memia auts per hotels, abitaziuns ed autras localitads. Er il bler traffic disturba ils organisaturs. Representants da Tavau e dal FEM han ditg tar ina discussiun al podium ch'els veglian chattar communabel ina soluziun.** Dapi 46 onns s'entaupa a la fin da schaner ina societad illustra a Tavau per assister al Forum mundial d'economia. Per sis dis stat Tavau adina en il focus internaziunal cun s'inscuntrar personalitads da la politica, da l'economia, da la scienza e da la cultura da l'entir mund en il lieu turistic grischun. In studi da l'Universitad da Son Gagl ha mussà che Tavau ha fatg il 2015 grazia al FEM in gudogn da 50 milliuns francs.

Ina valur da marketing dad 86 milliuns francs

Sco quai che *Simone Strauf* da l'universitad ha ditg mesemna saira a Tavau saja strusch pussaivel da remplazzar quel gudogn cun organisar autras occurrenz enstagl il Forum mundial d'economia. Sche quai vess dad esser il cas, lura cuzza quai varsaquants onns fin tar in profit. Da chattar autras occurrenz saja da preschent er na uschè simpel, ha menziunà Strauf, quai conferma er il studi da l'universitad. 21% dal dumber total da las pernottaziuns fetschia il lieu grazia al FEM e la valur da marketing per la destinaziun da vacanzas, tras las medias, giach tar 86 milliuns francs. N'avess l'occurrènza internaziunala betg dad esser pli a Tavau, lura haja il lieu da quintar en il mais da schaner cun ina reduziun minimala da svieuta da 22 milliuns francs, tenor il studi dals students da l'Universitad da Son Gagl.

Scriver avant ils pretschs na savain nus betg

Per Tavau saja il Forum mundial d'economia ina occurrenz nunpajabala, ha

ditg *Tarzius Caviezel*, il president communal. Il lieu profitoscha ferm cun esser per in temp mintga di en il center da las medias naziunals ed internaziunals. El haja er gronda tgapientscha per tuts quels che sa chattian bunamain serrads en durant il FEM, dentant cun in pau voluntad e solidaritad passan er quels sis dis cun bler travagl a Tavau. Avers il Forum mundial d'economia dad avair lieu en ina altra citad avess quai per Tavau intginas consequenzas dischplaischavlas, ha ditg Caviezel. Da scriver avant als hoteliers ed als locaturs ils pretschs na sappia la vischnanca breg far cun esser quai manaschis privats. Caviezel ha dentant confermà che la vischnanca vegnia segir a contactar ils hotels che exagereschan cun ils pretschs da pernottar durant il FEM. Quai sajan però be singuls ed uschia er excepziuns.

Agenturas d'intermediaziun profitoschan

Alois Zwinggi, il commember da la direziun generala dal Forum mundial d'economia, ha ditg ch'il pli grond pensum saja ussa da chattar ina soluziun communabla quai che pertutga ils pretschs per pernottar en hotels ed abitaziuns quel temp dal FEM. Las 120 interpretas ch'èn commembras da l'organisaziun sajan segir prontas da pajar fin 15% dapli per ina stanza per lur directurs ed emploiads, dentant tut las autras persunas che sajan professionalmain a Tavau durant il Forum mundial d'economia, per quellas sajan ils pretschs simplamain memia auts. Zwinggi pretenda urgentamain dapli trasparenza tar ils pretschs per pernottar. Ils gronds affars fetschian cunzunt las agenturas d'intermediaziun che profitoschan dal FEM cun er chattar participants da l'occurrènza che sajan prontos da pajar summas inimaginablas per ina chombra ubain ina abitaziun. Sco che *Paul Petzold*, l'antier hotelier e president dal cussegl d'administraziun da la destinaziun da vacanzas Tavau/Clostra, ha ditg,

saja da chattar ina plattafurma agrebala per far reservaziuns per pernottar durant il temp dal FEM.

Responsabladad e seriosadad

Il represchentant dal Forum mundial d'economia *Alois Zwinggi* ha ditg che er en l'avegnir haja l'occurrènza internaziunala lieu a Tavau. Aversan dentant da serrar intgins hotels, ubain succeder in attentat u accident en il center da congress, lura saja il temp dal FEM istorgia a Tavau. Cusseglia guvernativa *Barbara Janom Steiner* è stada pli che ventiraivla cun menziunar Zwinggi ch'il Forum mundial d'economia restia per intgins onns segir anc a Tavau. Ella ha er ditg ch'il chantun vegnia er en il futur a surpigliar ina part dals otg milliuns che la segirtad dal FEM custia. L'occurrènza porta a la regiun, al chantun ed a la confederaziun fitg bler, munta però er responsabladad e lavur seriosa, ha accentuà la schefa dal departament da finanzas.

Cun l'olimpiada 2022 avessan nus gi' ina occasiun

Quitads fa als responsabels dal Forum mundial d'economia er il bler traffic quels dis cura che l'entir mund s'inscuntra a Tavau. Er en quella chaussa saja urgentamain da chattar ina meglra schliaziun, è vegnì ditg tar la saira cun discussiun al podium. Janom Steiner ha menziunà ch'il project olimpiada 2022 en il Grischun cumpigliavia ina soluziun per deliberar la «Promenade» a Tavau dal traffic. Per il FEM vegnan er adina montads e fabritgads blers objects ed en quella chaussa saja da vegnir pli rigurus, ha ditg *Rolf Marugg* da la Partida verda da Tavau. Sche nus scumandain quai, lura na datti er naginas tendas tar la Cuppa Spengler, tar las cursas nordicas e tar ils divers festivals da musica, ha ditg *Tarzius Caviezel* tut serius. Marugg ha er manegià ch'il lieu dovria in plan B, concret autras occurrenz per na adina esser dependent dal Forum mundial d'economia.



Tarzius Caviezel, il mastral da Tavau, vul s'engaschar ferm per l'avegnir dal Forum mundial d'economia.

FOTOS G. N. STGIER



Sustegn survegn l'occurrènza er da la regenza, sco quai che cusseglia guvernativa Barbara Janom Steiner ha ditg.



Paul Petzold, il president dal cussegl d'administraziun da la destinaziun da vacanzas Tavau/Clostra, vul discurre cun ils hoteliers e chattar ina soluziun pervia dals pretschs auts per pernottar.



Na uschè intgantà dal Forum mundial d'economia è Rolf Marugg da la Partida verda da Tavau.



Manà la discussiun al podium ha Helen Issler, l'antierura moderatura dad SRF.

Uschè paucas restricziuns sco pussaivel

Forum mundial d'economia

DA NORA BALTERMIA / ANR

■ **A fin è ida la saira cun ina discussiun averta per il public. Varsaquants burgais da Tavau han nizzegià la situaziun per far dumondas, exprimer critica ubain far compliments per il Forum mundial d'economia.** In abitant da Tavau ha ditg che durant il Forum mundial d'economia haja la populaziun d'acceptar memia bleras restricziuns. Il pretsch ch'els abitants hajan d'acceptar entras las restricziuns durant l'occurrènza saja nagut sch'ins considereschia il gudogn, ha lura ditg *Alois Zwinggi*, il represchentant da l'instituziun che segna gia dapi 46 onns per l'organisaziun dal Forum mundial d'economia. El ha er menziunà ch'ins saja permanent en contact cun la vischnanca da Tavau e ch'ins examineschia mintg'onn communabel ed er cun la populaziun ina glista cun chaussas per in meglierament. Quai che pertutga las restricziuns prov'ins da reducir quellas ad in minimum, ha punctuà *Tarzius Caviezel*, il mastral da Tavau.

Schizunt pli baud en il mais da schaner

In auter punct che è vegnì menziunà dad in abitant èn las firmas che sa profiteleschan durant il FEM, senza esser commembras da l'organisaziun. Zwinggi ha manegià ch'ins empovia da cumbatter quai ed ins veglia persvader quellas da d'entivar commembras da l'instituziun internaziunala. In'otra persuna da Tavau



Clers plets d'Alois Zwinggi da la direziun dal Forum mundial d'economia.

MAD

ha dumandà sch'ins possia betg spustar il FEM sin in termin pli tard ubain organisar quel da stagiun bassa? Quai saja nagin tema per els, ha ditg Zwinggi. Essend ch'il FEM saja ina conferenza globala che tractia temas per l'onn actual tendeschian ins plitost da spustar il Forum mundial d'economia sin in termin anc pli baud en il mais da schaner. Or dal public è er vegnì ditg che Tavau avess da profiter turisticamain dapli dal Forum mundial d'economia.

Ir sin la fiera asiatica

El s'engaschia ferm per purtar anc autras occurrenz dal FEM a Tavau per

ch'ins pudessia nizzegià l'infrastructura dal center da congress pli savens, ha ditg Zwinggi. Proximain saja el en China e vegnia segir er a nizzegià quella occasiun per preschentar Tavau sco lieu turistic e sco citad per organisar ulteriurs congress e dietas. Plinavant haja la destinaziun potenzial sco lieu da vacanzas per la fiera asiatica. Paul Petzold, il president dal cussegl d'administraziun da la Destinaziun Tavau, ha sutsetgnà quel votum, ha però fatg attent ch'il mund existia betg mo da la China, mabain ch'i dettia er anc fieras pli manavlas che vegnian resguardadas memia pauc.